

**ጳውሎሲ
ታሶሎንቄ አሳስ
ፃፊዳ ናምዓንን ሲታ
ጊዶ ቆፋ**

ከርስቶሲ ናምዓንን ያናይሳ ጊሽ አይሾይኔ አሺ ዴንዲዳ ጊሽ ታሶሎንቄ ዎሳ ኪሳ ጋርሳን ሜቶይ ዳሪ ዳሪ ቢዴስ። ጳውሎሲ ታሶሎንቄ አሳስ ፃፊዳ ናምዓንን ሲታይ “ጎዳ ዩሳ ጋላሲ ማቲዴስ” ጊዛ አማኖ ቃላ ቲሺ ሂስቲ ዮቲዴስ። ጳውሎሲ ፃፊሽ ከርስቶሲ ያናፔ ካሴቲዲ “ማካላ አስ” ጌቱቲዛዴይ ከርስቶሳራ ኤቄቲዛዴይ ባሌሶን ሃይሳ አላሜዛ ቦላ ኢታቱሴኔ ማካላይ ዳሪ ዳሪ ባና ጉሳን ኢስታ አማኖ ጊጊሳናስ ዳፌቴስ።

ናባቢዛይቲ ዋዩይኔ ሜቶይ ኢስታ ቦላ ዳሪኮካ ኢስቲ ባ አማኖን ሚኒ ኤቃና ማላ ጳውሎሲኔ ሃራቲ ኢዛራ ኢሲፌ አሲዛይቲ አሲዛ ማላ ኢስቲካ ባ ዱሳስ ኮሺዛይሳ ዴማናስ ሚኒ አሳና ማላኔ ሎዎ አሶ አሳናስ አዛሎንታ ማላ ኢስታ ሎጫሲ ዞሬስ።

- ሃ ማፃፋይ አይኪዳ ኩሜሳ ቆፋ
- ጌሎሶ 1:1-2
- ጋላታኔ ሃዳራ ኢዋ 1:3-12
- ከርስቶሲ ናምዓንን ያናይሳ ጊሽ ኢሜቲዳ ቲሚርቴ 2:1-17
- አማኖን ዱሳ ጊሽ ኢሜቲዳ ዞሬ 3:1-15
- ኩሻ ቆፋ 3:16-18

1 ጳውሎሳፔ፣ ሲልዋኖሴፔኔ ሂምቶሳፔ፣ ኑ አዋ ያሳኒኔ ጎዳ ዩሱስ ከርስቶሳን ጊዲዳ ታሶሎንቄን አማኒዛ አሳስ። * - 2 ያሳ አዋፔኔ ጎዳ ዩሱስ ከርስቶሳፔ ኪያቱሴኔ ሳሮቴስ ኢንቴስ ጊዶ።

2 ጋላታኔ ዎሳ
3 ታ ኢሻቶ! ኢንቴ አማኖይ ዎዴፔ ዎዴን ዲጪ ዲጪ ቢዛ ጊሺኔ ኢንቴ ሲቆይካ ካሴፔ ጉጄቲ ጉጄቲ ቢዛ ጊሽ ኑ ኢንቴ ጊሽ ያሳ ሎጫሲ ጋላታናስ ቤሴስ። 4 ሄሳ ጊሽ ኢንቴ ቦላ ጋኪዳ ጎዴቴሳኒኔ ሜቶ ኡባን ኢንቴ ሚኒዳ ጊሽ ኑኒ ኑ ባጋራ ኢንቴ ዳንዳያ ጊሺኔ ኢንቴ አማኖ ጊሽ አማኒዛ አሳ ኡባ አቻን ጩቄቶስ።

* - 1:1 ሃዋ 17:1

5 ሄሲ ዉሪካ ያሳ ፒርዳይ ሱሬ ጊዲዳይሳ ቤሴስ። ሄሳ ጊዶን ዋዩ ቤዩዛ ኢንቴ ያሳ ካዎቴሳስ ቤሲዛይታ ጊዲ ቤቴዴታ። 6 ያሲ ጊሎ ጊዲዳ ጊሽ ኢንቴና ዋይሲዛይታ ኢዚ ዋይሳና። 7 ዋዩ ኤኪዳ ኢንቴሲኔ ኑስ ሽምፖ ኢጣና። ሄሲካ ጎዳ ዩሱስ ኪርስቶሲ ዎልቃማ ሳሎ ያሳ ኪታንቻታራ ሳሎ ቦላ ቆንጨዛ ዎዴ ሃናና። 8 ሄ ዎዴ ያሴ ኤሮንታ አሳታኔ ጎዳ ዩሱስ ኪርስቶሳ ሚሺራቾ ቃላስ አዛዜቶንታ አሳታ ቦላ ኢዚ ባ ሃሎ ላጮ ታማን ኬሳና። * 9 ኢስቲካ ጎዳ ሲንሳፌኔ ኢዛ ቦንቾ ዎልቃ አቻፊ ኪቺዲ ሜርናስ ዳዮን ቃዓዩታና። * 10 ኢስቲ ቃዓዩታናይ ኢዚ ጊሻታ አቻን ቦንቹታናሲኔ አማኒዛይቲ ዉሪ ኢዛን ማላሌታና ማላ ኢዚ ዩዛ ጋላሳን ሃናና። ኢንቴካ ሄ አማኒዛ አሳራ ዳና፤ ጋሶይካ ኑ ኢንቴስ ማርካቲዳይሳ ኢንቴ አማኒዳ ጊሻሳ።

11 ኑ ሄሳ ቆፒሼ ኑ ያሲ ኢንቴና ባ ዌይሳስ ጊዲዛይታ ሂስቲ ቆዳና ማላ ኢንቴ ሎዎ አሳናስ አሞቲዛ አሞዛኔ አማኖን ኢንቴ አሲዳ አሶዛ ዉርሲ ኢዚ ኢንቴስ ባ ዎልቃን ፖላና ማላ ኑ ኢንቴስ ኡባ ዎዴ ዎሶስ። 12 ቃሴካ ኑ ጎዳ ያሳኔ ኑ ጎዳ ዩሱስ ኪርስቶሳ ኪዎቴሳ ማላ ዩሱስ ኪርስቶሳ ሱንሲ ኢንቴ አቻን ቦንቹታና ማላኔ ኢንቴካ ኢዛን ቦንቹታና ማላ ኑ ኢንቴስ ዎሶስ።

2

ማካላ አስ

1 ታ ኢሻቶ! ጎዳ ዩሱስ ኪርስቶሳ ዩሳ ጊሺኔ ኑ ኢዛኮ ባና ቡሳ ጊሽ ኑ ኢንቴና ቆፊሶስ። * 2 አያናይ ቆንጨሲዴስ ዎይኮ ቃላይ ጊስ ጊዲ ዎይኮ ኑፔ ኢንቴስ ኪቴቲዳ ኪታ ማላ “ጎዳ ዩሳ ጋላስ ጋኪዴስ” ጊዲ ኢንቴ ቆፋን ያርክ ያርኮፊቴኔ ዳጋሞፍቴ። 3 አኒካ አይ ሃኖንካ ኢንቴና ባሌሶፎ። ዳሮ አሳይ አማኖ ካዳናፔ ሲንሴ ዳያናስ ቤሲዛ ኢሲ ማካላ አሲ ቆንጮንታ ዲሺን ሄ ጋላሳይ ጋኬና። 4 ኢዚካ ያሴ ጌቴቲ ጎይኔቲዛ ኤቃ ያሳታ ኡባፌ ቦላራ ባና ዶቁ ዶቁ ሂስቲዛዴኔ ያሳራ ኤቁቲዛዴ። ኢዚካ ያሳ ኬሳን ኡቲዲ ባና “ታኒ ያሳ” ጊዲ አዎጃ አዎጃሳና። *

5 ታ ኢንቴናራ ዲዛ ዎዴ ሃይታ ሃ ዮዮታ ኢንቴስ ታ ዮቲዳይሲ ኢንቴስ ቆፊቴዜሻ? 6 ኢዚ ባ ዎዴን ቆንጫና ጋካናስ ሃዒ ኢዚ ቆንጮንታ ማላ አዚ ዲጊዛኮኔ ኢንቴ ኤሬታ።

7 ማካላንቻ ፀራይ ሃራይ አቶሺን ሃዒካ አሶ ቦላ ዴስ። ጊዶ አቲን ሃይሲ ሃናናይ ኢዚ ሃዒ አሶንታ ማላ ኢዛ ዲጊዛዴይ ኢዛ

* 1:8 ላጮ ታማን ጊዛይሲ ኢሲ ኢሲ ቃላ ቢርሸላታን ገፌቲቤና። * 1:9 ኢሳ 2:10 * 2:1 1ታሶ 4:15-17 * 2:4 ሂዚ 28:2

አገጥሞ ከቻና ጋካናስ ዓላ። ⁸ ሄሳፌካ ካሊዲ ጎዳ ዩሱሲ ባ ዱና ፕሮፕሪኒ ባ ቦንቾ ዩሳን ዳይሳና፤ ማካላንቻይ ቆንጫና። * ⁹ ሄ ማካላንቻ ዩሲ ዓላዔ ዎልቃን ሄሲካ አስ ባሌሲዛ ማላታታኒኔ ማላሊሲዛ ሚሻታን ሃናና። * ¹⁰ ሄሳሶካ ኤኪዲ አቶንታ ማላ ቱማ ኢዲዲ ዳዩዛ አሳታ ባሌሳናስ ዱማ ዱማ ኢታ አሶይ ያና። ¹¹ ሄሳ ጌዶን ኢስቲ ዎርዶ ዮዎ አማናና ማላ ያሲ ኢስታ ቦላ ባላ አሶ ኪታና። ¹² ሄሲ ሃናናይ ቱማ አማኖንታ ኢዲዲኔ ዎርዶ ዮዎን ኡፋዮቲዛይቲ ዉሪ ፒርዴታናሳ።

ሚኒ ኤቂቱ

¹³ ጎዳን ዶሴቲዳ ታ ኢሻቶ! ኑ ጊዲኮ ኡባ ዎዴ ኢንቴ ጊሽ ያሴ ጋላታናስ ኑስ ቤሴስ። ጋሶይካ ያሲ ኢንቴና ኮይሮፕ አይኪዲ ኢንቴ ዒሎ አያናን ዱማቲዳይታኔ ቱሙ አማኒዲ ኢንቴ አታና ማላ ኢንቴና ዶሪዴስ። ¹⁴ ኑ ጎዳ ዩሱስ ኪርስቶሲ ቦንቾ ጊሼቲዛይታ ኢንቴ ጊዳና ማላ ኑ ዮቲዳ ሚሽራቾ ቃላ ባጋራ ኢንቴና ዒይጊዴስ። ¹⁵ ሄሳ ጊሽ ታ ኢሻቶ! ኢንቴ ሚኒ ኤቂቱ፥ ኑ ኑ ዱናን ጊዲን ዎይኮ ኪታን ዎይኮ ኑ ኢንቴስ አሲ ዩዲዳ ቲሚርቴዛ ሎዔሲ አይኪቱ።

¹⁶ ኢዚ ኑ ጎዳ ዩሱስ ኪርስቶሲ ቃሴ ኑና ሲቂዳይኔ ባ ኪያቴላን ሜርና ሚንሴሶኔ ሎዎ ሂዶታ ኢዚ ኑስ ኢሚዳ ኑ አዎ ያሳይ። ¹⁷ ኢዚ ኢንቴ ዎዝና ሎዎ አሶኒኔ ቃላን ሚንሶ።

3

ዎሳ ጊሽ ሺቂዳ አይሾ

¹ ዉርሴላን ታ ኢሻቶ! ቃሴካ ጎዳ ቃላይ ኢንቴ አቻን ሃኖይሳሶካ ኤሌሊ ኡባሶ ጋካና ማላኔ ቦንቻታና ማላ ኑስ ዎሲቱ። ² ቃሴካ አሲ ዉሪ አማኒዛይሳ ጊዶንታ ጊሽ ማካላንቻታፕኔ ኢታ አሳታፕ ኑ አታና ማላ ኑስ ዎሲቱ። ³ ጎዳይ ጊዲኮ አማኔቲዳይሳ። ኢዚካ ኢንቴና ሚንሳና፤ ዓላዔፓካ ኢንቴና ናጋና። ⁴ ኑ ኢንቴና አዛዚዳይሳ ኢንቴ ሃዒ አሲዴታ ሺን ሲንሳፌካ ኢንቴ አሳናይሳ ኑኒ ጎዳን አማኔቶስ። ⁵ ጎዳይ ኢንቴ ዎዝና ያሳ ሲቆኮኔ ኪርስቶሳ ዳንዳያኮ ካሌሶ።

አሶ አሳና ማላ ኢሜቲዳ ዞሬ

⁶ ታ ኢሻቶ! አሶ አሶንታ አሳፕኔ ኢንቴ ኑፕ ኤኪዳ ቲሚርቴዛ ማላ ዶንታ አማኒዛይታፕ ኢንቴ ሃካና ማላ ጎዳ ዩሱስ ኪርስቶሳ ሱንሳን ኢንቴና ኑ አዛዘስ። ⁷ ኢንቴ ኑ ሌሚሶ ዎስቲ ካላናኮኔ ኢንቴ ኢንቴ ባጋራ ኤሬታ። ኑ ኢንቴናራ ዲዛ ዎዴ አሶ አሶንታ

* 2:8 ኢሳ 11:4 * 2:9 ማቶ 24:24

ጮ ደዒቤኮ። 8 ቃሴካ ኦና ሶፔካ ካስ ጮ ሜላ ሚቤኮ። ጊዶ አቲን ኢንቴፌ ኦናሲካ ኑ ቶሆ ጊዶንታ ማላ ቃማኔ ጋላስ ዳቡራን አሲ ሚዶስ። 9 ኑ ሄሳ አሲዳይ ኢንቴ ኑና ካላና ማላ ኢንቴስ ሎዎ ሌሚሶ ጊዳና ጊዲፔ አቲን ኑስ ኮሺዛይሳ ኢንቴፌ ኤካና ኑና ዲጊዛ ዎጋይ ዲን ጊዴና። 10 ኑ ኢንቴናራ ዲዛ ዎዴ “አሶ አላናስ ዶሶንታ አሲ ካስ ሞፖ” ጊዛ አዛዞ ኢንቴስ ኢሚዶስ። 11 ኢንቴ ጊዶን ኢሲ ኢሲ አሳቲ አሶ አሶንታይሳ ኑ ሲዩዶስ። ሄይታንቲ አሶ አሶንታ ሜላ አሳ ዮዎን ጌሊዛ አሳታ። 12 ሄይታ ማላ አሳቲ ባ አሶ ጮፀ-ጊ አላና ማላኔ ባ ካስ ማና ማላ ጎዳ ዩሱስ ኪርስቶሳ ሱንላን ኑ ኢስታ አዛዞሲኔ ዞሮስ። 13 ኢንቴ ጊዲኮ ታ ኢሻቶ! ሎዎ አሶ አላናፔ ሙሌካ አዛሎፍቴ። 14 ሃይሳ ኑ ኪቲዳ ቃላስ አዛዜቶንታይ አኒካ ዲኮ ሄሳ ሚሳቲዛዴ ሎዔሲ ካሊቴኔ ኢዚ ባ አሶን ዩላታና ማላ ኢዛራ ጋጎፍቴ። 15 ጊዶ አቲን ኢዛ ኢንቴ ኢሻ ማላ ሃንቂቴ አቲን ሞርኬ ማላ ያሎፍቴ።

ወርሴሳ ሳሮካ

16 ሳሮቴሳ ጎዳይ ኢዚ ባ ባጋራ ዮዎ ኡባን ኢንቴስ ሳሮቴስ ኢሞ። ጎዳይ ኢንቴናራ ኡባራ ጊዶ። 17 ሃይሳ ሳሮካ ታ ታ ኩሼራ ኢንቴስ ግፊዳይ ታና ጳወሎሳ። ታ ኪታስ ዱማ ማላታይ ሃይሳ፤ ኢዚካ ሃይሳ ታኒ ታ ኩሼን ግፎይሳ። 18 ኑ ጎዳ ዩሱስ ኪርስቶሳ አዶ ኪያቴሲ ኢንቴናራ ኡባራ ጊዶ።

አራሳ ጫቆ ማገፋ ጋሞላ

New Testament in Gamo (ET:gmv:Gamo)

copyright © 2011 Wycliffe Bible Translators, Inc.

Language: Gamo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gamo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 12 Mar 2019 from source files dated 12
Mar 2019
dffa0cbb-5f77-5875-bf95-f4176677af45